

ԳԼՈՒԽ ԺԷ.

1 Յաղագս թե զիա՛րդ յուզեաց Շապուհ արքայ Պարսից ի վերայ քրիստոնեութեան:

2 Այլ ի ժամուն յայնմիկ, յորում սպանաւ երեցն Մարին հանդերձ եւթանասնաւքն, յարոյց հալածանս մեծ Շապուհ արքայն քրիստոնեութեանն հաւատոց. հարկաւք եւ պեսպես վշտաւք նեղէր զնոսա եւ հարուածովք բազում: 3 Եւ յետ այսորիկ հրաման տայր ընդ ամենայն տեղիս իշխանութեան իւրոյ, թէ որ միանգամ զանուն քրիստոնեութեան ունիցի յիշխանութեան իմում, զամենայն մարդ միանգամայն հանցեն ընդ սուր սատակեցցեն. զի մի՛ գտցի յիշխանութեան իմում, որ քրիստոնեայ անուն անուանեսցէ զանձն իւր: 4 Ապա բերս բիւրուց կոտորէին, եւ հազարս հազարաց. զի այնպես տուաւ հրաման ի թագաւորէն, զի ամենեւին քրիստոնեայ անուն ի սահմանս նորա մի՛ գտցի:

ԳԼՈՒԽ ԺԸ.

1 Յաղագս Վարդանայ մահուն ի թագաւորէն Արշակայ, նենգութեամբ իւրոյ եղբարն Վասակայ սպարապետին:

2 Իսկ Վարդանն, Մամիկոնեան տոհմին տանուտերն, զայր հասաներ հրեշտակութեամբ յարքայէն Պարսից առ արքայն Յայոց Արշակ, եւ մատուցանէր զհրովարտակն առաջի նորա: 3 Եւ պատմէր նմա ի նմանէ բանս խաղաղութեան եւ զհաշտութեան, եւ զերդմանցն հաստատութիւն: 4 Եւ տայր պատգամ, թէ որ ինչ եղեն՝ այն ահա թողեալ լիցի վնասն. բայց դու յայսմ հետե կաց յուխտին բանի, եւ մի՛ անցաներ ըստ բան երդմանցն քում աւրինաց՝ յոր երդուար: 5 Ապա թէ ոչ՝ դու գիտես, եւ քո աւրէնքն որում ստեսն: 6 Իսկ Արշակ թագաւորն սիրով ունէր եւ սիրով լսէր պատգամին, եւ հաւանէր զասացելոցն: 7 Եւ խաղաղութեամբ արծակէր զմեծ նահապետն ի տուն իւր, զի երթիցէ հանգիցէ յաշխատութենէն յերկայն ճանապարհէն. եւ զնաց:

8 Եւ յորժամ եկն նահապետն Վարդան առ Արշակ, ոչ դիպեցաւ անդ կրսեր եղբայր նորին Վասակ առ արքայի: 9 Ապա յետ այսորիկ եկն Վասակն, եւ գրգռէր զթագաւորն ընդ իւրում եղբարն երիցու, ասելով՝ թէ Վարդան է որ մատնէ զքեզ թագաւորին Պարսից, եւ կամի կորուսանել զքեզ. եթէ ոչ աճապարեսցես վաղագոյն սպանցես զնա, դու կորնչիս եւ աշխարիս Յայոց: 10 Ապա եւ կին թագաւորին եւս գրգռէր զթագաւորն սովին բանիւք, եւ զբանս զաւրաձարին Վասակայ հաւատարիմ առնէր նմա: 11 Վասն զի ունէր նա զոխսն զայն ընդ Վարդանայ, զի նենգութեամբ եւ դաւով եւ մեծաւ երդմամբ սա այս Վարդան կոչեաց զԳնէլն զայր նորա, յորժամ սպանանէր զնա թագաւորն Արշակ: 12 Իսկ կինն զնոյն ոխութիւնս պահէր նմա, վասն այնո-